

童山詩集

童山詩集卷八

綿州李調元雨村

乙酉

送侍講周稚圭

升祖

分巡蒼梧

詞臣拜命到邊郵一路旌旗當遠游
入直蘭臺碑影過山巡梧郡瘴氛收
雪消遠嶂犀牛下日落空城翅虎遊
遙想月明清興發題詩應上大雲樓

河橋柳色動驪歌萬里離江繡幃過
此際西甌初奉節當時北院共鳴珂
馬行驛路桃榔到人過岑溪蛤蚧多
李白巖前倘相憶涼風天末意如何

讀祝芷塘詩稿

我家岷之濱柴門對江淨哦詩二十年空谷只孤詠抗
懷思古人屈指嘗竊評緬維炎漢初文章我蜀盛司馬
與王揚洪鐘破幽磬祠堙列俎亘萬古殘膏賸乎昂起
射洪高蹈寡聲應感遇篇三十丹砂金碧瑩刪述志非
夸垂輝千載映眉州蘇父子玉局我所敬大海揚鴻波
餘流空汀溼後來頗落落道古或差勝斷獄老吏能遣
山集可并有明三百年升菴獨雄橫百代爲牢籠肯與
何李並其餘卽無識數子獨追勁曰余生也晚狂愚頗
自命少年走吳越文藪林是鄧豈惟飽名山兼多編紉

贈一自遊京師名流交遍訂曹

晉趙

富詞藻吳

雲才華稱丹徒

夢樓我之師趙

損宋

駿驅併程翁

無敵持議或倒柄當其掀髯時濡筆何豪興杰起有東

海

子

俊鶻掃凌競天罰徹骨窮敝衣不掩脛明時盛文

彥絡繹多唱賡遍識我不能爲坐健忘病憶昔初識君

待朋良竊慶頗聞東筍多全豹窺未請握手不須與歸

思挂吳榜去歲曲江頭并馬日未暝又理南征帆春秋

重親迎鴈去燕復來鳩喚婦寡鴈今來同華省新詩獲

細證秋水出芙蕖不飾晨粧靚餘霞綺滿天散作珠光

孕遺音聞正始韶樂放淫鄭向日低頭拜今者刷目更

嗟世曰蛙黽衆器紛勃靜豈無獨彈者改絃不堪聽豈
無錦繡段文理味絲經長笑白贊元還疑韓譽孟溫李
亦堆塚皮陸苦餒釘箇中知者誰局內自無情鄉風敢
云繼庶幾有獨醒大雅君扶輪前賢我作鏡君當爲羽
翼我亦堪佐乘誰蹠巨靈掌一手湮河壩誰持照妖鑑
退斷邪魔徑僞體倘不裁風騷滅其性齊名誰側目王
張須啄硬請君玩此篇知余言不佞

奉和祝芷塘

德麟

移居四十韻

啼鶯藏柳苑鳴鳳聚篁梢舊碍低門瓦新誅仄徑茅移
雲先自牖得雨從郊園剪青蔬嫩臙除碧草交喜無

麗吠巷便有燕來巢簾捲湘紋裊帷褰細字抄預防低
置榻先教遠安庖愛客陳遵飲譚文杜牧抓洗墨纔泛
蟻題紙每蟠蛟薄調高原滿王猷竹未苞客來喚剝啄
僧過話流泡博厭臬呼座基嫌敵在輶不能同木偶幸
免聒金鏡靜獲安居樂幽占履坦爰何煩弋者視直遠
俗人呶自子居初儻留余饌共焦婦能藏斗酒僅解飮
盤肴登壁巾常挂揮塵塵屢籍紛紛抽妙思切切似同
胞蠅止誰能亂鷄鳴自聽嚶銜連南北住戶待晚晨敲
凝僕扶踞寐饑兒隔屋咬有詩呼共和無語不相嘲鶴
故聲聞野麋原巧脫豕得緣隨地占投契實天教羨爾

言集卷八
幽栖好慚余潤世滑蘇牀移雨漏杜屋爲風麕耳爲隣
街沸心因湫隘恆人看多當櫟我繫亦如匏再徙身無
定三遷意未忒翻隣豚在笠頗類雉羅冠却憶南村屋
常環北舍菱春花籬自爛秋稻圃非礲終喜山邨僻何
嫌地勢頗自來居共邱却似處同櫟聚柏行分袂狂多
起舞袖卽看槐蔭密遠映竹枝嚮問萊思黃獨包餐想
綠筍淵明松菊廢甫里釣船拋他日林園去寧辭築圃
勦

挽易州牧李文耀芰裳繼配烈婦氏覺羅安人

柔腸成鐵血成丹易水蕭蕭日色寒不使荆軻獨千古

女中又見白衣冠

送編修諸桐嶼重光出守辰州

冊府仙郎駕五騮一麾出守下瀛洲金鸞待草推高第
銅獸專城領上游日落掛帆雲夢澤春深攜酒岳陽樓
紅梨却憶校書日滿目丹霜大楚秋

送虞部趙檢齋璠師出守衛輝

紗帳芳筵錦不如欣逢拜賜虎符初尊前近接春生坐
境內遙占雨逐車院北他年遷五雉關西此日象三魚
董帷叨受傳經列欲訪春秋舊地與

昔歲登瀛動帝京今膺劇郡領專城一朝列宿承新命

十載冬官舊有聲渡口烟深淇水暗城頭雨舞太行明
獨憐祖席褰帷外不盡當年絳帳情

贈李桂宮

一曲當筵曳碧霞綠腰按罷月初斜黃昏客散歸何處
米市街西第二家

湘簾不捲坐敲碁斜對疎櫺有所思門外輪蹄聲漸歇
錯疑人到叩銀時

霓裳罷舞駕輕輪笑入紅樓索酒巡飲到玉山扶醉去
春光又屬別家人

醉帶朱顏倚竹床冰紋衫子透颼涼分明百尺銀河水

斜挂紅霞一縷長

七月廿三日陳六邀同侍御劉乙齋天成編修劉

雲房

權之

芮鐵厓

永有

檢討張鶴林

習

蕭蘭園

芝

員外孟鷺洲

邵

主事姜松亭

錫嘏

遊王家園

結伴出城隅勝遊得賢主機舟集羣彥攜榼臨芳澗久
不到郊坰秋色已如許乍聞蘆葦風一似昨夜雨昏昏
塵夢中破此一聲櫓樹影搖水光半裊游絲縷野鶩雜
家雞颺翅滿晴渚沙禽知讓客飛去鳴深浦遠近起漁
歌炊烟動入語十里聞雷鳴百丈飛泉吐健間何砰磅
誰觸蛟龍怒復見好澄潭相與互延竚岸草侵長虹荒

重刊詩集卷一
烟幾村聚深碧誰家園鬱鬱林之塢翠蘿啼百鳥數步
得朱戶破薛走青蛇頽牆竄蒼鼠昔時神仙窟薰天競
歌舞勸客羹駝蹄管絃日淒楚豈知榮枯異美人化黃
土至今雕楹間猶餘篆香炷我來拔劍歌激越梢林莽
側身視青天白眼甲前古散髮外形骸醉語昨同侶大
笑謂吾輩此遊當再補

傅雯畫鷹歌

大野秋高塞草枯狐兔狡捷紛當途凜凜鋒鏑十二闕
胡爲不擊來吾廬細觀素練畫作殊條鏃猛腦不可呼
傅雯妙筆天下無行年七十皓髭鬚猶能上馬左右射

眼光炯炯如元珠朝來落筆風霜起勁氣有與蒼鷹俱
獨立杈枒吁可畏搜身天地無全俘飽不厭去何其愚
得毋養之如布乎看君辭筆良非粗詩成爲我千壺沽

九日陶然亭登高和編修曹習菴元虎元韻

佳句爭傳濕粉牆新添韻事入重陽

君詩有穿荻小車
疑生艇出林高閣

當登山之句爲陶然
亭杰作一時傳誦

城中客散看花地野外人歸打稻

場滿院風聲吹菊紫一汀鷺影對葭蒼吾儕痛影何須
計莫教啣杯却憶鄉

聞永清丞陳蘊山署永清令

何必定登科只須早爲官何必居顯職只須不素餐陳

子不羈人飛驥汗流丹副車真詔中一擊如報韓昨者
到京華暫駐爲盤桓贈我綈袍貴爲憐范叔寒今者元
方來欣聞慶彈冠爲言眉上黃欲學河陽潘召看劍花
量洗濯驚龍蟠豈有新發礪操刀割難難人生無良朋
何處吐心肝倘有絃歌聲吾將採輶軒

奉和祝芷塘

德麟

移居接葉亭詩

并序

亭爲湯西厓先生故居小有林泉花鳥之勝芷
塘徙居有詩謹疊前韻叙相知之雅道過從之
歡有懷輒書語無倫次時六月立秋前一日也
年來頗怪卜居頻聞檢園林別有春接葉鳥窺攜酒客

隔花犬吠乞詩人天留別館容才子地敞高軒絕俗塵
只恐吟成愛遙贊定教槌脚代眠身

萬瓦參差甲第雄渾渾各據幾人同百年人物思詩老
一旦天緣付史公得句每從朝退後著書多在宿齋中
笑君萬卷閑身擁文字何殊困蠹蟲

何須結構起重樂疊石疏池已足看屋上好鳥惟我愛
簷前怖鴿待君安勗公自羨朱門暝杜甫常愁白屋寒
莫向石欄當晚坐瘦軀應祛露珠團

泉石平生野性宜烟霞痼疾未全醫每從郊外看雲去
閒步街頭對月遲天意寄君真似磨人間著我亦如碁

何時笠澤烟波路同與漁翁訂夙期

芷塘有詩再疊前韻

藥裏書籤寄跡頻
竭來深巷度秋春
敢爲林下歸田計
却似湖中汎宅人
萬里家山鴻爪雪
九衢燈火馬蹄塵
未能擺落輕紅去
只爲官閑可寄身

憶昨登瀛說兩雄
頭銜謬許武文同

櫛下好事者以杜詩將軍不好武稚

子總能文爲吾二人誼故云

君方醉似藉中散
我亦狂如蓋次公

百歲幾人巢幕上一時諸子入禪中
不知蝶蚌因何事空穀年年許寄蟲

幽齋靜對影樂樂想見窓前展卷看
有客從遊如蔣詡

無人高卧似袁安今年燕語新巢暖往日龜言舊地寒
待到菊花重九放來看蛺蝶鬧成團

怪君癖性獨居宜真是膏肓不可醫小屋打頭伸已慣
高樓半臂常遲書成逸品還臨帖奕爲孤高懶着棋
聞道牆頭多擲果莫因迴避誤佳期

三疊前韻

閒居使我往還頻亭館無多總貯春每怪幽居如處子
從來良友比佳人小山作賦堪招隱秋水爲文不受塵
底事相過便泥飲醉鄉雖小足容身

高齋煮酒論羣雄屈指樽前幾箇同若問在荒寧陸氏

芷塘禮閣出毘陵趙雲松先生門下至今門立憶程公
先生出閣有我亦庄荒敢取盈之句

一簾草色疎烟外三徑苔痕淺雨中却憶丁香舊池館

飄零無主咽秋蟲

癸未余房師爲夢樓先生丁香館先生舊居也

爲問蕭蕭倚笛樂海棠花發共誰看同時止酒師彭澤
異代論詩到建安雨屣送僧蓮寺近夜爐留客竹牀寒
相逢細話長安事慣聽松風試小團

疎狂豈是合時宜愚拙由來藥不醫宦味差同漁掌欲
生涯悔食馬肝遲愁懷曲似牽蘿帶歡味殘如已算棋
九萬里風安稅駕鵬程雖遠與君期

四疊前韻

茅屋新詩賦出類果然巴客和陽春吟成河北壇中句
格鄙江西社裏人琴本無絃常挂壁瓢常有酒不傾塵
獨彈古調無人識疑是青蓮作後身

跋扈飛揚誰最雄狂歌痛飲余能同獻書不作妄男子
作賦何妨亡是公習氣銷磨歲月裏抗懷嘯傲烟霞中
試看長鳴曷且烏絕勝得過號寒蟲

城南誰氏建雕欒休退空懸宅畫看醉裏功名付桑落
夢中富貴總槐安鳳栖只愛桐枝好馬老方知豆葉寒
爲樂及時須記取爲君指破舊疑團

積鼻文園病酒宜邇來牛鬪不須醫客贖晨卧門敲久

妻怪天寒釀熱遲每欲偷閑思遲筦何須詭智託圍棋
齊名莫怪旁人妬珍重聲華萬古期

雪後與王貽堂

燕緒

步陶然亭抵暮方歸得上字

城市如鷄栖並鷺思俯仰幽人有佳興忽作出塵想遙
指城南亭巖寒久不往及此雪初晴招攜覓清賞拄笏
對西山村樹何蒼莽所恨曉霧蒙未放孤峯朗其東有
危剎徑造不須杖何年風拔屋空餘古佛像聯步大野
中始覺天宇廣一一飛鴉還時時落木響微陽下白屋
近照蒼苔上雖未愜幽探頗快心目爽誰人肯共來今
者只我兩妙意忘形骸道言互開獎却笑夢中人昏然

墮塵埃

奉和相國尹望山先生

繼善

晚香園雜咏用杜工

部道何將軍山林韻十首

人傳丙作相天賜午名橋里本居青甸官原傍紫霄三
朝身更健八督勅初招竊喜平泉近無嗟絳帳遙

東閣金甌卜西園玉署清老樓阿閣鳳歡動上林鶯夜
火談藜杖晨厨試御羹遙知退食罷扶杖便吟行

潞國神如故溫公樂不支黃扉初賜第綠野盡穿池捧
日丹心久憂時白髮知嘉謨將入告隔夜牘頻披

總以人爲樹都驚眼不花有才呈必驥無足不添蛇鼎

內陰陽燹壺中日月除擁書千萬卷不數鄴侯家

制府東南久延賓館閑閑評詩版沈宋得士比歐梅山

愛棲霞去門容野鶴來

謂東子才

妙龍題壁處積久不生苔

爲近恒春苑常添太液泉花堆三品石柳放一春綿身

作中朝柱囊無外任錢蒼生遙共艤但願福如川

並少同年在真成晚節香位高心愈下處熱意偏涼

御製常催和奇書出舊藏總因圖報國忘却鬢毛蒼

芝蘭皆國器玉樹繞天池謝傳臨棋局山公倒接離進

宮容跨馬下殿許扶兒我本登龍客還思御李隨

鳳翹朝陽日龍翔集景雲英才原樂育器識必先文公奉

命教習庶吉士甫到館卽以士先蠟燭三條限蠻箋十
器辭而後文藝爲訓時推名論

樣分片菲承雨露揆藻競繽紛
文章師賈董宗主得苟何夜雪門前久春風坐上多股
肱諧喜起元首載賡歌從此休光炙論詩得屢過

哭亡兒汪官用東坡哭幹兒韻二首

自我來京師前後得兩子洗盆見頭角嶄然已俱似後
得半月殤年未登家史最先得汪官譽兒真不恥時時
不離膝攬鬚迎笑喜我每自外歸排門便呼爾豈知三
月病亡纔兩歲耳哀哉痛入骨那禁淚如水

維時正除夕別歲我已忘臨晨請禱回兒已奄欲亡病

妻抱而泣一慟起扶床猶待分壓歲

蜀人年終以紅繩穿錢繫諸兒襟帶

間謂之壓歲

牽衣始仆僵庸醫坐滿室脉理何能詳安得飛

蓬島爲覓回生方竟隨二豎去使我裂中腸圖殯復何益空令此心傷

再用東坡次葉濤見和詩韻

我兒喜弄書不識亂翻耳倘長誦六甲定驚裴長史卽今任拈筆塗抹不禁爾他時草凌雲要當屬此子豈意緋衣名已與長吉似早知命不延功名亦逝水但留吾犢在農耕亦足喜何必定讀書力食未爲恥

汝母久病腳常抱兒卧床自兒捨母去母病輒欲亡強

起理葬車中野遙相望倚門思我兒狀貌記不詳我欲
挽慰之未慰先自傷況汝父素羸能不俱斷腸繞膝不
見兒仰天號欲僵歸來見遺物愁思忽無方

感興二首

起草 金鑾氣吐虹孤羆人說坐深叢大鵬已看翔雲
外小鼠何勞鬪穴中身後茫茫頻問卜目前咄咄只書
空歸來萬卷縱橫甚自此全教付蠹蟲

從今閉口再休談世事經過徹底諳失意韓樊羞等伍
得時韋杜近魁三心知朱紫傳聞懼話到青藍授受慙
若道文章原有價向來落筆頗思覃

明妃出塞圖

爲編修戴聖作

漢選明妃入掖門寧知三載未承恩臨行尚得君王顧
空望瑤階拭淚痕
蒙塵遠適呼韓國雲垂四野陰山黑
貂裘匹馬真可憐
執轡胡兒掀帽立和親此去委胡塵
絕域難逢內地人
相隨只有宮中月猶向天涯照妾身
從來艷色偏招妬
當時悔不千金賂自倚蛾眉絕代無
此生竟被丹青誤
曉來邊雁叫離羣
聲斷琵琶不忍聞
青塚有魂歸不得
淚灑巫山十二雲

王荔裳

國梁將之趙州送別得來字

自笑竒狂亦自哀
相看懷抱向誰開
宦途似我何時達

知己如君幾日來白璧自當歸趙地黃金應更憶燕臺
莫教壯志銷磨盡盛代方需濟世才

丙戌

和程芷南

湘

席間見示舊作韻

共對青燈語夜深雲山相憶幾光陰知君珠玉多新語
爲我宮商誦舊吟韞匱好沽求價寶空囊已盡結交金
相逢細說年來事莫怪危言欲正襟

落日春城伴侶稀欣逢佳節感芳菲酒腸別後嫌君八
詩骨從前悔我肥頭上花枝晴壓帽暗中柳汁早污衣
請看燕子來媒日借得東風便試飛

沈利羊毫筆歌

沈利作筆世無雙截玉爲鋒銳莫當貯雲藏霧纖毫裏
出手肅肅生秋霜從來羊鬚埒不得無乃叱自初平石
山間老穎不敢規疑是金華洞中客制成作字如飛龍
學士珍重藏裘鍾我道宜行不定楷只作柔毛問價買
芷塘以醉蟹見餉率賦三十韻

休沐苦逶遲退食常頓憊未得半晌歡能謀幾箸噉結
思葦鱸久素嗜魚蝦最朝唼食指動夜獲朶願卦故人
知我饒使者餽予拜輪困出尖團郭索露桓介執穗罷
朝甞登簿已親酌擎去蘆花簪攜來椒葉盞乳融白玉

化殼壓青銅敗沫冷餘夜霜臍暖含春靄纔分半勺啣
先貪一嚼快鎔腹未成沙鏤酥不用膾江風入座腥河
雨傾槽浦簇簇釀橙餘昏昏夢稻外真堪甕下卧絕勝
門前掛想當伴月居夙凜聞雷誠敵虎氣何猛夾蛇才
亦大兩戟終成降五鼎遂蒙害怒目竟何爲橫行定誰
賴輸與採捕郎擔作街衢賣納於皆醉中使爲獨醒戒
緣知途太艱始覺世愈隘嗟予墮名網類爾一冠帶蟹
名冠並少微官熱空多密友怪孰肯見餽遺今乃獨沾
句臨愁恣細酌斫雪助粗糲兩手持有餘一洗愁無奈
豈唯遇酒渴益用搔詩疥太元徒紀揚爾雅亦誤蔡短

篇有微詞留待識者會

遲荔裳不至

西窓特爲故人開
百種忙時亦暫迴
爲報月輪休更照
今朝幽屋有誰來

送王荔裳

國梁

歸錢塘六十韻

曉來忽黯然
月挂河橋樹
蕭蕭薊門柳
故人從此去
憶昔識君時
各抱國士遇
瓊枝亂草中
秀穎茁天趣
有如對醇醪
未飲心先醉
看君氣凌雲
宜直承明著
暫爾息鵬飛
知非予所怒
相與纔浹辰
白駒已難駐
飄然趁飛鴻
一別淚如注
頗聞客吳苑
扁舟蕩容與
復聞滯舒城

寒氈坐疏如三年秋雨
中夢斷鶴廳署今春
闕禮閑奇才復飛翥
白袍如鵠立佇望列
子御遲遲獨不來惆
恍難爲據童僕忽傳
呼行旆城南仔塵昏
街鼓晚掛闥入門遽
未得通寒溫先喜顏
色故爲言去後思正
如君所慮連歲涉風
波餬口未曾饅大樽
浮江湖豈是五石瓠
兩見厄登門竟成涸
轍鮒何處覓黃金空
餘一紙賦不逢伯樂
過何能逞馳驅失志
誰當羞額蹙無所措
我本金閨彥同隊日
相响鳳池不使居文
字吹毛麒麟剪翅送
樊籠問爾欲何作巷
南與巷北比隣不數
步分韻占鶴鳴調琴
薦蛇跼夜燈抄岐伯
午醒烹日鑄邇來掃
東閣

重刊言集卷之八
懸榻爲徐瑞有子通一經十年纔就傳惠然許我來丹
鉛點訓詁豈唯蛾子術益得他山助人情憎太熟世眼
逐修嫺所謀百不遂更遭飛語妬對面皆仇敵豈免瑕
疵懼以此中夜嘆心事紛若絮富貴雖浮雲守株安冀
兔功名雖聽天奮飛難逐鷙矧見梧葉殘松菊思荒圃
旣來不須臾又欲了嫁娶安得霍子高苦勸公無渡離
合本無常萬事來胸臆嗟吾漸衰耗早覺日不如才得
升斗俱已屬形骸雇只如辛苦蟲那似風標鷺文繡非
所願所貴沒世譽喜君有傲骨氣性出天付聲勢一觸
目對之貌如卿天涯誰知已一語重季布人心真如面

要在金石固知子磨不磷豈復畏鼎錡今君何不情一
帆借舫解驛樹遙相望烏帽沒復露西湖佳麗地梨花
青旗沽回頭應念否嚶嚶求友聚勉爲踏歌詞聊以當
餽賂夜雨聽何時北風但延僚

移居看雲樓樓爲梁家園特勝同部郎中劉竹軒

秉恬有詩因和其韻題曰看雲者余家樓原名也

信是遷喬出谷幽林塘勝處價難酬垂青莫嘆來過少

滴翠偏憐往事悠樓爲李少農故居名
滴翠園今皆圯廢霜倒菊花全覆

砌風凋梧葉半侵樓旁人若問思家意爲說痴人記刻

舟

題采桑圖

春樹芸芸三月暮東疇西陌皆桑樹春蠶蠕蠕眠正饑
童稚相攜采桑去大兒登梯剪青葉老翁仰面兜衣接
小兒上樹捷且便下有人歌荷擔立桑底兩兒未知事
或坐或立牽衣戲日落鳥啼人未歸樹影橫斜亂青翠
田家蠶事一春忙贏得枝頭綠滿筐安得此圖掛琴堂
無奪民時桑與秧

送編修趙雲松

翼

出守鎮安

玉堂揮翰究推誰二載蠅頭四海知自古詞臣多出守
況今才子最能詩桄榔樹底行蓮步薜荔門中謁柳祠

莫遣瘴烟侵鬢髮他年燕許候摘詞

送侍御王德圃

啟緒

巡視南漕

臺臣卿命理漕舟馳馬臨江氣似秋天賜一旌巡衛水
風高千艘下揚州紅橋多爲催糧泊綠樹何妨載酒遊
聞道官梅動詩興可能折贈一枝不

丁亥

病脚

吾年三十五諸病嘗幾遍四體苦針灸所仗足輕旋邁
來亦不赦蹉蹉難自便始如炊甑蒸漸似爐鞴煖癰瘦
忽生脛曳輪傷折趺雨氣燥如膏陰風攢冷箭蹠盤溫

裂裳包裹費殘絹扶攜乃一顛匍匐就三咽祇可坐奈
禪豈堪趨高宴以此深閉門時獲親書硯椒艾雖日佩
香多價亦賤薰澆刻不停脚跟終不轉但恐甲煎淺無
助馨烈薦何如室有蘭氤氲長弗厭君看捷足者得毋
稍健美紛紛奔馳中鈍骨何由變書此以自警庶免流
俗見

奉和少宰何念修

逢傳

堂廳藤花詩

清絕人間占一枝風流前後此軒墀

藤花爲前明吳龍
菴先生手植先生

有味藤
花詩

紅英皂莢紛垂日想見先生坐判時

鶴廳曾長六卿班花月清談總未聞今日風光誰管領

人傳啟事舊推山

公以選郎直選少宰前此未有也公

啟事時人傳爲佳話

清珠何似似含苞
瑤瑤尊尊葉暗交
斜掛紫雲如尺蠖
因風走上老槐梢

花欲留香接藥欄
曉烟翠幙戀輕寒
也如宋相當年事

金帶圍邊好共看

今年藤花開最久
直接芍藥之盛

秋海棠和徐大德元韻

嫩蕊嬌愁傍畫牆
幽人移玩坐匡牀
半酣只爲風情醉
不睡多因露氣涼
簾捲恰宜苔蘚綠
杯啣能乞菊英黃
縱饒春放垂絲好
那似孤寒氣味長

戊子

憶昔行

送合江令蔣時南文奎清南入

憶昔逢君揚州城然諾直欲千金輕馬上論交卽千古
眼光對我秋江明星斗無端忽南北南鄭城邊別不得
自攜雞酒話離愁日脚欲壓華山黑豈憶才名三十年
鄭虔還坐廣文黜一朝擲筆騰空去十八瀛洲春宴還
竭來謁選驚老醜白云折腰爲五斗踏遍天下今更奇
劍南山水落吾手我方卧病辭承明林泉之樂思至今
他年拄杖爲老民花柳村中聞好音

西園值中翰王

嵩柱

直宿

園林雨初歇蟬鳴槐樹陰斜陽一以下微風來相侵亢
懷思往古幽思復誰尋又知今人居不有真知音

中秋與唐堯春樂山看雲樓

牆頭古木靜無風露砌殘尊此夕同天到秋分雲不蔽
人逢氣爽月當中練明岸掩林端魄繳密偏憐塞上鴻
少久夜深涼似水却嫌歸騎太匆匆

古詩送洗馬宋小巖鏡出守衡州

落落巖邊石悠悠山上雲豈不感同居出處忽以分故
入膺劇部告台駕在門攜手上河梁我私聊復陳吾黨
居清要所分清與渾渾者思肥已清者思保身與其失

於富無寧安於貧利乃義人反福乃禍之根前堂肉鼓
吹後堂絲竹喧縱不思傾軋豈不傷慈仁丈夫思經國
前賢皆可循儒者一及物甘膏如飲醇專城亦足樂矯
飾何足論衡湘多芳草採密莫嫌頻

送學士韋約軒謙恒視學山左

出典文宗任最尊同年讓爾首承恩蜀袍學士方辭院
魯國諸生盡在門學術總期歸有用游談切忌戒無根
大明湖上多秋柳只恐詩成又斷魂

悼僕朱貴

捧劍從余久擔囊稔爾辛死無主魄生是愛才人黃

耳悲千里青衣負一身城南
望不忍見孤燐

送蕭大超羣倅山陰

本爲同里客偏在異鄉親家
難爲吏官貧易傲人草
痕千里暮柳色一鞭春此去
山陰道千巖萬壑新

童山詩集卷九

綿州李調元雨村

巳丑上

過良鄉縣驛館和吳白華

省欽

使黔回京題壁韻

望望京華只半程
倉皇應識故人情
一般白板新泥壁
墨落星軺分外明

宿孫河懷同司孟瓶菴

超然

劉松菴

垣王元亭

草橋蹀躞馬蹄輕
尚憶鴛班逐隊行
昔伴南曹三使者

戊子秋

三君點試差同宿於此

今餘西蜀一寒生
鴻泥印雪當

年影牛鐸搖風此
夜聲明日田園賦
歸去萬山千水不

勝情

夜行得月

黑夜不得炬路雜草縱橫寒鴉作鬼泣吠犬如豹鳴月
乃憫我困推出一輪明漸分村樹色稍聞人語聲僕夫
辨前路但擇深軌行閃閃林間燈投宿諒有程馬知欲
稅駕蹉蹉蹄何輕漏下始得店洗塵飯香粳舉頭謝明
月一飽天所令

過牛關山

昔日過牛關山翠滴清曉今日過牛關山色翠如掃乃
知山靈本無心妍醜各隨人心擾看自愁容不看山返

怪山靈見君惱牛闌西復西覓矢知牛歸惟有犍爲路
歸志尚依違寧戚魯歌丙吉問窮通大抵皆關運他年
老子出函關誓擬隨他不擬還

順義道中見杏花

二月風過草茁芽一灣柳港聚人家醒園本是吾歸處
却向盤山看杏花

密雲抵舍檢點行篋見先大夫丁亥除夕賦詩

二首因憶戊子除夕之事爲之默然敬依韻追
述之

魂飛一騎出都門汗濕羊裘體不溫敝屣功名何足問

破巢身世更無論，千家自放年終爆。五鼎空留日後尊，
今夕捧書遺澤在。吳天何以答深恩。

昔信驚聞旅館門，盈腮熱淚拭來溫。人情洶洶寧堪料，
天道恢恢好細論。甲煎誰燒香滿室，辛盤獨奠酒盈尊。
回思守歲邊關夜，正祝天年報國恩。

望髻髻山

何年藐姑仙，遺下倭髻髻。高蟠半空中，髣髴女媧制。
但化爲峯歲歲里，人祭雲鬟晞風餘。石髮濯雨齊烟染，
遠山眉霞拖照水。袂似將奔月宮，如欲朝玉帝。適當鑾輅
巡禮重沈沈，與瘞四海盡奔趨。香幢走龜筮，我方頭如

蓬回垢貌復儼對君祇自慙遙知不屑髡他年擬入山
披髮自茲逝

望盤山

奇絕盤山一望中金花銀草燦晴空巍峩宮觀何輪奐
常我香鞋一老翁

宋錢歌

并序

平谷城東紙寨村民掘土得宋錢兩甕皆自太平
平以下至哲宋紹聖以上年號俱草書通時地
屬幽州不知何以埋此蓋寶泉出亦有時也因
作此歌以紀其事時乾隆三十四年二月十六

日也

夜夢有神向我言青蚨無數將騰騰朝來童子走報我
阿堵萬貫來頽垣我聞竟與貪泉似口雖未飲心先醉
這奴換得數緡回篆文一一錘宋字憶昔宋錢法宗祖
輕重一準開通譜太平天子賜草書紀元首冠前無古
嘉祐以下圖尤密逃盜難邀寬法罟自從刑國亂乾綱
輪廓不便紛朝章免役助役何擾擾愚民失所多逃亡
爾時此地非中國何事流泉來此域得非新法逼使然
爲叢驅爵皆投北投者大都半商賈後來國虛究爲虜
何不早聽閔子言仍學魯人爲長府君不見平谷還是

舊幽燕古錢猶帶青苗土

雙槐行

紙寒寒西雙槐樹鐵幹多年飽霜露空腹能容數十人
幾遭秦火根愈固村人指點爛柯南上有金背千年蟠
行往天炎禱則應一鳴大雨禾苗霑我聞此語詫不已
陰陽有時豈關此海上驪龍睡方熟狐媚直竊其柄耳
君不見漢苑宮中六百株晝聶宵炕因時敷土燭調利
天下俱何怪雙槐榮與枯

崇正鐵礪歌

并序

平谷舊有鐵礪圓長尺徑一寸分鎮城樓歲久

城圮寄古寺中上有御馬太監杜勲及薊遼總督吳阿衡順天巡撫陳祖苞監製等字爲崇正十年十月造因作歌以紀之

漁陽古郡扼要地箕尾分野析木次何年築起百雉墉
重樓直跨飛鳥背中有鐵櫓敵力斗挿架各鎖城門四
鍛鍊無乃尉遲爐礪錯不假泰山礪當時鼓鑄知爲誰
天精下視雷公避鎔成費盡司農錢千夫扛壓此安置
捫尋竟日手生稜黑花銷出崇正字監造旁組異與陳
大瑞杜勲董其事憶昔中原方鼎沸闖關左革亂明季
烽火如麻十七年宵旰頻憂九重帝深宮夜夜空枚卜

棘門壩上皆兒戲就中竊柄惟閹童橫行即杖上方賜
日殺無辜報天子賊指山西關不閉軍中消息傳未真
祭文親得君王製豈知人上李陵臺麟玉鳴騶方得意
黃巢血已染長安解甲紛紛各歸第反作縋城說降客
我曹原爲富貴計可憐無關一金甌社稷身與山河碎
地覆天翻日月移空擁泥沙拋野寺掣肘還思未放時
隔朝猶帶硝磺味嗚呼此曹何代無聖如莊烈猶爲愚

蛺蝶詞

蛺蝶復蛺蝶去歲南園草間見翩翩日逐鳳子遊百花
香裏魂猶戀今年知我在邊垣飛飛異地來相唁忽如

羈栖萬里人足音倏喜逢親串吁嗟子命苦荼苦少年
頗驚文采絢聲價欲貴勝王筆夢寐肯趁莊周變卽今
那復誇粉腰羽衣摧落形骸賤東風夜夜吹鄉心故山
桃李開應徧芳草王孫歸未歸天南天北淚如霰

雙燕曲

梁間雙燕子翾翾雌與雄銜泥營新巢結構何其工巢
內生三雛孜孜仰食同出入不得停朝暮爲哺蟲殷勤
一春過兒體漸肥充羽毛初長成洗刷意尤隆呢喃使
學語引上庭西東舉翮忽分散不顧飲食供或飛入上
林隨鳳栖梧桐亦有膝下侍倦飛乃相逢雌燕望諸兒

啾唧守巢中雄者老更累餬口不肯慵脫翰侵風霜遂
受百疾攻途間遭其兒苦訴心忡忡公然置罔聞去去
任所從離巢忽不返母乃罹矢弓縱有三雛衆不救天
年終空使無伴雌孤苦啼命窮吁嗟此三雛罪大人誰
容有兒不如無仰天自搥胸

得家書

一紙平安報開緘帶淚看不知成永訣猶自勸加餐母
老思歸里妻愚懼解官可憐家數處何處是團圓

題吳秉仁雙鶴圖

吳生畫學李將軍花鳥沒骨俱有神就中雙鶴圖第一

種內能寫青田真揭朝下簾卧清晝依稀羽客夢中觀
胡然白露滿庭寒雪影襯襪飛座右一鶴獨峙三山岑
俯啄直無滄海深一鶴如人長而立自愛毛衣方自戢
峭壁懸空似九臯長風謾謾驅松濤紫頂丹眸各有態
一聲曉唳霜天高此物由來性相警貌入生綃猶炯炯
遭逢不敢望乘軒萬里烟霄心未冷我令好爵恨虛縻
那復陰鳴子和之昂昂休說雞羣裏君特未見其父耳

感懷二首

仕宦亦何謂田園胡不歸半生妻子累一死友朋稀病
每無醫覓貧惟有力依道旁誰可憫流涕自相揮

一歲疲奔命千秋恨結冤人心縱如此天道亦寧論
蕉鹿知今夢尊鱸負昔言堪傷清白吏遺得子孫存

東閣

無計拋愁閒又閒東風招我出東關雪消崩道多停水
雲滿溪田爲近山青冢有人松寂寂綠疇無牧草斑斑
老民相告春耕及我本農夫未得還

與繆漚川遊萬壽寺和鄧大春韻

郊外連鑣聽鳥鳴招尋野刹倍多情石槽霜檜枝橫卧
泥壓冬花葉暗生客惡塵多思洗濁僧愁事少反嫌清
連朝拘守空城裏今日來觀大界明

遊春

無奈春光鎮日催，依然連轡出城來。
草抽細石燒痕出，柳擁河沙水勢迴。
野老偶歌孤樹看，同人背指一花開。
自因節屆清明近，滿地烏鴉啄紙灰。

水峪寺

茂竹叢林亦夙緣，小亭一望便悠然。
雲岑積有千年雪，風磴涼無六月天。
怪石能邀佳客坐，清泉只許老僧煎。
邇來陡覺登山健，更欲捫蘿到絕巔。

李花

與爾同根蒂，飄零未有家。
如何叢棘裏，也放一枝花。
風

猛猶強笑霜攢莫漫夸泣然爲雨下傷類本同嗟

平谷見橡櫟樹

卽蜀呼青岡樹也

此樹睽離二十秋一株忽憶故鄉稠
橡當夏熟鸚鵡至葉爲冬燒婦女收白髮不供筇杖倚青山難禁斧斤搜
年來聞道都成炭從此童山愈可羞

清明 二首用杜工部韻

柳榆村外換新烟上塚家家趁渡船
碧血遺兒空有淚黃泉見父恨無緣
百年魂自桐鄉祭廿載心應桂石憐
但覺風搖非樹靜可堪日麗著花燃
僕因恩重多澆酒鴟爲悲深不啄錢
底事蒼天留不得定教運阻已辰年

聲聲泣向太盤東地下寧應作耳聾烟景無邊今又到
天倫有樂昨皆空慈烏反哺情何異精衛啣冤志本同
絲滿三春望烟草紅愁二月如霜楓身慚走狗鳴雞裏
心痛呼鳩語燕中聞道故山營蘭室應知贅世早名翁
重經大悲菴有感

再來蕭寺黯傷神風景依然似隔旬幻影泡花生死夢
鬢絲禪榻去來因雲烟有態徒過眼天地無情不庇身
到底虛名竟何益如今真是大悲人

白河

眼底清波淨俗埃沙橫畧約踏蒼苔一雙浮鴨下流去

却被狂瀾倒送回

重過北路廳

笑見沙河沸滿襟
九原曾此竭丹心
碑如羊肺爭垂淚
詩似王褒欲廢吟
遍野春暉仍爛爛
近山雲氣自陰陰
去年瞻拜庭闈處
惟有悲啼遶樹禽

沙河經明謁陵行宮

百雉城頭長綠蘿
五雲屯處鬱嵯峨
玉輿不見從天降
金盃還聞出地多
月暗平林趨鐵馬
風淒荒棘泣銅駝
鈴山老猾今何在
休唱朝陵駐蹕歌

嘉靖十九年嚴嵩始議築城建行宮

于此以爲展廟陵墓之地故嵩上朝陵後有此地今爲駐蹕村之句事見世宗實錄

湯泉

湯泉非真湯乃是造化鑪北冥苦沉寒膏沃陰爲儲
取明河水倒瀉仙人壺五行秘不得蒸氣上縈紆深
自無底一竇見澄湖濯浴喜自便炊爨捐樵蘇扇戶不
肯放白玉嵌盆盪瀏瀏鳴渠聲似轉井轆轤解衣沐磅
礴有如鷗與鳬一洗百垢身現出雪色膚風痺入骨疾
忽如帚埽除安得千疲癢坐此姿自如博施兼濟衆溫
暖遍窮廬

憶編修祝芷塘

德麟

與君同詞垣文思爭天巧僞體歸別裁流傳役江鮑當

時俱少年氣壯思逞狡交盡天下士曼睞夸娥媼騷壇
互逐角各各競媚姣就中君最狂我輩中佼佼風燈一
瞬餘稀散星與昂碩果二三子同盟復自撓今君在金
閨錦繡出金鉸而我泣窮途蓬頭雜山獠清官無一錢
稚子方饑餒詩書救不得眼看侏儒飽飄泊四十口嗷
嗷祇心攪行當歸去來眷言想鱸菲一生好直率無禮
恐類綬君如問我踪泥上覓鴻爪

憶中翰程魚門

晉芳

當代著述才髯翁
帝所簡五百文撐腸萬卷書在眼
濡毫中書堂鴻裁多手撰風騷推老將登陴氣自憫親

其筆陣雄大蘇名無赧典籍互紛亂苦由後人鐸君獨
一手定綴補羽陵東縱橫叩石渠真如肉貫串三長侍
天祿四海走碑版至今天下士踏破鐵門限我雖竊虛
聲其實豈有耽乃復忝商摧談詩共杯琖攤錢向書市
載歸如蝨蝨災梨多近儒大半遭削剗有時雜齊諧令
人一笑莞千載定誰傳一个我先據

憶侍講沈雲椒

初

少年愛交遊兵越走迢遞高明仰休交喜得御元禮汪
然見宏度千頃波瀾灑我父神明幸羹土正濟濟米鑑
一賞拔糲糠出玉米南北倏睽違世故皆大抵後先登

薇垣紅藥看蕤蕤癸未大羅天聯名上丹陛玉堂多春
宴文字相觸抵八磚坐慵懶改衙拜恩慙豈非畫葫蘆
依樣少根柢經綸一日長喜我山公啟昨顏忽不憚見
我賴有泚師恩猶在口遺愛相對涕他人或不解惟君
深識底可憐畏人知兩袖清如洗

憶學士韋葑軒

謙恒

人生天地間大抵涸塵拂獨君光明胸卽心遂悟佛慈
雲主利濟毀銅意不偏遂致失兩大囊空無一物昨君
掌北門鰲頭高屹屹清如一條冰食已無須乞如何闕
里地金人起忽岫瀋鑑應平衡莫使堯藩屈韓愈關浮

重山詩集卷九
屠北斗仰誰弗今君選佛能選儒寧獨不君有韋陀之稱時方觀學
軀我方讀蓼莪欲廢伊蒿蔚苦海出何時過去好漸極
應借寶筏渡不煩親執紼軒駟滿京華文彩紛綴芳不
見古先生予懷徒鬱鬱倘遇白脚師寄訊話初訖

懷庶子褚左相廷璋

聞君掌蘭臺銅樓呂校勘自非採春華何以芳芝荅和
詩同館喧作賦挑燈暗以我爲長劍擊賞無乃濫京師
盛宴遊催花羯鼓摻豈無文字飲紅袞解圍纔而君獨
不聞趨朝日已昨每逢下清班螭頭語纔暫去歲羅奇
懷悲火煎似燼爲君述其由白圭復且三先君死勤民

大夫壁初瑤墓誌得鴻筆歸待伐石鑿君曰應我爲搖
筆意殊慙君看報國心天意竟摧陷因之悟微名畫餅
不可噉行當歸杜門守我素恬憺

憶侍讀吳白華

省飲

前漢循良傳龔黃見伯仲愛民在捕盜捍害等捍截古
直推馬遷談議本街巷我友執彤管董狐不足替大筆
如椽欒飛向天門那又似金城堅攻撼豈怯幢杜門懼
浮言常若警予降有來斛米投譬鐘以筵撞昨聞先大
夫忠魂氣吐虹飛輿卽過我門已懸雪幢索我先銘詞
翻閱眼初覩滔滔讀一過有類雨鴻淙江海首去暴兇

脫少賊贖此而不紀載石室可衝淙茲言起幽靈堪愧
俗吏憚子孫雖清白猶當事耕糴

憶給諫丁芷谿

川湖

前輩留典型風流惟給諫我見真嫵媚人怪頗疏慢暨
自瀛洲還物色已歲宴無因敢投珠按劍恐相睨眼青
一盃餘客邇遂勿問徵歌興益豪論詩或強振有時呼
博塞壘菜鳴嗟辦芷谿宴客肴有松黃甚美故有嗟辦句從來名士狂多
爲神所娛三已色不愠一跌吁可患鱸魚苦思鄉老馬
還戀棧總爲報君恩非圖自酣豢嗟予苦命垂全家
仰薄宦飄蓬忽入雲浮泊類葭菼昨者到京師欲訴先

使覲共談十年事絕似泡影幻俱是未歸人極目天南
雁

憶翰林沈南雷

士璋

鷄雀栖枳籬鳳皇翥雲采羽翮同生身分飛不相待昔
年遊餘杭負笈從師在見君軒眉宇氣壓海昌海阿閣
不同巢自顧覺形猥歡見春風坐復此叙寮來我如墻
頭草春過已萎腰君方上苑梅凌冬初吐蕾龍門雖晚
登大器調鼎鼐昂首赴天衢猛力應十倍曳裾不到處
要津據每每欲爲已階梯暗中摘爾罪回頭負鹽驢行
行向魁君看擾撓塵閭來已十載雲雨互翻覆物態

逐時改此際不警覺途窮泣無乃

示舍弟龍山臨右軍法帖歌

古人論書首八法龍蟠鳳翥推蘭亭奕奕風神不復見
真跡留得籠鵝經嗟予少年有酷嗜一掃百紙何能停
弱腕恨無羲之鬼日月消磨煤與瓶濡毫纔與塗鴉似
媚趣難乞王家靈有如嫫母施朱粉倏倏豈掩籀籀形
今汝亦復描與畫汎愛未得真典型顏筋柳骨百不講
宋寒李俗無分町胡不細領三折筆中有神工驅風霆
天令泄秘傳人世幸未追攝煩六丁汝生况有長指爪
刷字定見親發硯銀鈎須要以力屈習筆豈不由雕翎

但恐通貌不通意徒摹外美夸嫵婷試看百工各有技
居肆刻志門常扃當其巧奪五花錯真宰往往悲青冥
不見前輩學此藝衣帛先染方殺青蘭絲牛毛入精細
半塗肯廢如斷墜方今衙齋苦羈滯並聚何異沙中鷁
喜汝厭鶖自苦學隔離不復來前庭續我平生不會業
寫遍樹葉愁飄零野鷺家雞皆可厭指南豈惜千丁寧
袖手觀罷贈長句聊當座右爲汝銘

示舍弟龍山止酒詩

爲聖爲賢總禍泉閒來須讀養生篇笑他屈殺劉伶婦
不是區區爲酒錢

月夜有感

溶溶月色碎鋪堦樹影冥冥一院篸
幽古愁看來座鵬
公私間殺滿池蛙危如髮引千鈞石
追似身臨萬仞崖
我本纖毫塵不染底須明鏡照人懷

自密雲回京

陰雲四野黯天低細雨惺鬆釀作泥
人正歸時花已落
天當春盡草初齊纔看漏日翻鴉背
便有輕風送馬蹄
隻堠道旁應笑我長亭又見好詩題

宿三家店

古柳圍村落茅簷暫解羈
雨知隨客歇月不甘家圓夢

裏悲蝴蝶歸期憶杜鵑天涯無限淚流盡不成眠

將至平谷有懷舍弟

弟已歸南去余今又北征不堪狼狽態更抱鵲鴿情浮
跡萍無定風來樹有聲何時能返轍與爾耨而耕

石匠行

有翁折腳啼道上皮肉淋漓新吃杖如狼差吏驅出門
不許攔街呈訴狀旁人指點翁來因舊是南山伐石匠
問翁胡爲遭鞭箠眉皺胸填氣沮喪往時縣中例立碑
去思德政屹相向不知有益黥肖無名謂甘棠何足讓
十字市口樹如林幾欲斲盡青山嶂自吾祖父供此役

日往高巖親度量車輦夫扛百不停巍巍鰲戴萬人仰
立時官府顏色歡給賞纔足沾村釀此項名爲里下派
何曾一家解索償而今室內無一丁只餘老身權補放
字刻青天過手多至今名姓半遺忘朝來新命初升堂
便有循聲千口颺不卽鳩工垂不刊龔黃未免心怏怏
昏夜傳呼急於火天明縣前聽點唱可憐蕭條一細民
囊橐無錢倩誰餉今者稍稍愬私情拍案立郎遭考掠
君看腰間錘與鑿薄技陷人無地葬但使官箴果不朽
身雖餓李亦何妨

窑戶行

洵陽城外逢窰戶面目黧黃衣藍縷見人自指腸中饑
唏噓欲說頭先俯自言本是村中農薄田不足療貧窶
閉道縣官方築城磚甃所需億萬數手胼足胝力能爲
人言利可壟斷取雞鳴豈惜孳孳爲踉蹌首自充官雇
窰竈直入九地深引水乞得蛟龍吐積薪欲與南山平
洪爐日夜雷風鼓鳩工輦運動成羣嗷嗷索食一何怒
皆云頒出水衡錢暮四朝三待分割豈知命窮天亦忌
屢聞縣中換官府凡百工作俱飭停國帑封固動不許
可憐物價皆稱貸索者日日叫阿堵何嘗博得溫飽資
翻爲官工守不去卽今散砌堆四門漂流填刻愁山雨

重刊言集卷之六
已成不見料直酬再失何由補無錢坐食山爲崩
殘冬漸已過炎暑昨聞監司經此地攀轅伏訴逢猛虎
零星壞輒偶拾遺反以盜賣遭笞股請君看我窩中人
十人去者已得五眼看麥壠盡雙岐反羨耕農得其所
勸君止此勿復言我亦爲此留茲土

童山詩集卷十

綿州李調元雨村

己丑下

立秋日偕樂定翁鄔廣文繆滙川東臯村觀蓮
今晨晴明掃宿霧新秋氣色浮眉顙風流賢宰走報我
爲言東臯饒紅蓮廣文先生發高興攜榼招看無停延
並轡同趨花世界紅粧萬朶迎馬前不知錦幃長幾許
但見十里翻田田淩波步襪相貢媚各房珠子堆聯駢
自剝冰丸雪濺齒頓覺涼沁無炎天坐飲碧筍興未已
早見深柳催鳴蟬牆頭主人復不惡土簾泥屋張綺筵

君看礪車雲欲作倘歸不速波掀船速題長句追清賞
他日記取重來緣

樂定翁以蓮子茗見餽二絕

撚髭枯坐正沉吟忽得瓊漿碧碗斟此意非君誰識得
如今最苦是蓮心
長慚地主有虛衷舊仰壺飧授館中解道精操冰雪似
可憐風味不如翁

大風行

砲車雲起風欲刮噫氣遙從土囊發千里銅烏動地來
敲破下林土聲戛須臾勃怒鼓衆籟勢如焚燎不可滅

舍卒豈有鵬枝搖造次旋看白馬鍛方春太皞正乘震
百卉含英向陽蕙不雌寧遇大王雄吹萬還起青蘋末
胡爲颺忽來無端大木連根亦遭拔金鴉初騰忽反舍
石尤得令防傾軋東君縮舌亦無權豈救桃李柔姿折
我時養晦深閉戶薄寒射人如箭筈看他終朝聲不寧
簾揚畢竟何時歇

今夕行

今夕舍弟勸我酒知我四望寡朋友銅盤燒蠟日吐光
酒酣拔劍蛟龍吼檀州城南多老鴉曉來遶舍爭啞啞
我起更衣舍弟立滿天星斗河漢斜問我曰歸定何日

塞上哀鴻正求匹不如奉母共歸田入山何須婚嫁畢
相攜聊復牽君坐天涯我亦愁無奈蝸爭鬩角安知羸
雞助功名豈堪唾君不見張儉無家復無親范滂母亦
非恒人古賢爲善尚不可何況作惡非爾我

今日行

今日不樂思故鄉廉纖春雨沾衣裳撲入亂點花風香
徘徊出入空徬徨憶昨年如小犢黃戲接泥孩著襦袴
高堂大笑億千場今日顛蹶如點犢藥裏支病須扶將
夢魂夜夜歸梓桑彷彿侍我先人傍覺來兒女趨成行
怒索衣飯啼兩廂青雲之交俱忘乞憐顏色低不揚

奴僕侏視身方昂室人交謫空憂傷而我醉後猶顛狂
城邊潮河聲湯湯恨不傾入壺中嘗負券百叫無一償
肯顧啾啾短與長

別侍讀吳百藥

肇元

人生樹上花方開卽已落又似竹初成便有風吹箨君
獨明此理養晦安寂寞以此陳老病閉戶自煎藥春來
扶杖起春英已滿閣客至定何人無非覓殘酌有時燃
明燈高軒縱六博別開晨雞啼九衢車馬錯而君日三
竿睡足衣嬾著君看先大夫精神頗矍鑠循良過卓魯
年纔半百約豈知筋力虧外強裏已弱山隴泰安仰本

隕巢安託顧猶驚異縣何異燕處幕樂極反成悲愁來
忽如瘡憶我金石交長歎中夜作

別編修王詒堂

北緒

別君纔如昨流光已駸駸行在太史院暇卽過攝飲繞
座雜優伶醉倒便長吟憑陵呼五白扇門絕窺闥靡夜
不上元未怕金吾禁其謂樂無極馳驟方傑傑豈意升
與沉同荷家督任君爲中丞後門籍猶勲蔭顧我孤兒
行一塊卧孤枕由來懷晏安爲戒等毒鴆蹉跎不知年
遂墜龍蛇讖昔作水中魚漉漉忘惟保今爲轅下犢喘
舌自吐給編紵滿塵寰無一來相臨所遭均如此其實

亦太甚煩君玩此篇淚如綆靡晴

別水部李隨軒

廷揚

從來雅與俗嗜好區酸醜我輩各有志何必相與咸憶
昔初識予情通先以緘滄洲酒滿載走遞開瓊函香名
固早飲豈祇麴車饒我父牧君邦顧畏凜民若澹臺不
至室正氣欽巖巖况復重俠義千金一諾嚴濟困不待
告如果投餓獍十載困冬曹爛醉不受銜員外縱新得
反若琉璃監君時爲琉璃監督我今脫官繫家累翻難芟心懸
無所薄搖曳風中繆倉皇謀三窟笑問何如薨聞君五
湖志何日張烟帆悲哉命蹇者西往獨颿颿

別檢討李琪園 銓

束髮事詩書，丹鉛銳意刊。不知重校讐，所述俱可刪。
寧知有慧種，天聰未易扳。不著書一卷，遽上玉筍班。
擲我古錦囊，已窺豹一斑。問年曾幾何，約在笄字間。
以是窮剗剗，真宰寧得慳。我故終閉門，對君懼羞顏。
枉駕昨見晤，諧誼切痼瘕。索我紀行詩，哂笑貌似訕。
百戰不轉睛，乃在古繼鑠。余在平谷有宋錢他時不朽業點勘煩乘
閒。我今百憂集，夜如魚眼鰕。豈謂窮而工，但覺可憐孱。
人生如寄耳，得失何足患。悠悠身後名，付之一笑顏。

別檢討張鶴林 鬯

張子脫畧人窮達無不可通籍十載餘家計仍轍軻少
年美丰儀路擲潘岳果忽學范蠡術佐鹽鴟夷舸拔身
龍蛇窟常恐利爲禍折節詣經腴紫袍堅欲拖竟遂登
瀛顙珥筆上青瑣人在春風中和媚復安妥當共酒半
酣解衣槃礴羸接拍歌偏能舞劍狂亦頗臨事乃介然
終日神無情與我論舊詩篋破千束綵平生不下人今
乃首肯我沉痾已連年枉顧怯赧赧君如憫孤笑寄我
雲五朶

別侍御孟鷺洲

與君年齒齊生辰隔卯甲氣如豐城劍寶光初出匣識

回省試後並馬離劍峽連翻上金門元白君獨壓我時
拔青雲傲居同巷狹樓床雖各異對花酒容呷分門爲
挈簪香閣避串狎爾時職綱曹熟精律例法掇去繡衣
郎豸冠高岌業昨歲去貴陽文衡豈承乏而我趨瑣闕
拜跪蔽跣跣歸院柳邊逢握手輒忉忉歡然復幾何年
光熟羊腍遂爲室家累母心痛方推行當約南村青疇
共畚鍤看我芳塘上持竿打水鴨

別農部唐駕澤

樂亭

我友天下才爲文脫脂粉奏議積如山插筆展奇蘊模
稜恥同輩往往鳴孤憤及其水石出利弊原包槩平生

話同心與我生相近衆口笑顛狂大半出黃吻但吸杯中物開懷付一听只宜謝賓客樞機在周謹君看茂名人豈保顏如槿我今百憂集日夜淚自投入愁出亦愁誰散我心溫知君舊癖萌塊胸高似弁有婦賢且能舉案共牢吞祇恐舞破甕典索到袍緼何時歸去來笑共買山隱

別吏部王鎮之

汝璧

昔遊司寇門謬忝國器重引入虎皮邊下帷親講誦傳薪每夜分玉脂出內饗君爲東床客鴻名壓小宋遠在巴渝西未得紗帳共後先入藥籠鵬程一翅縱南院喜

同登師恩夢寐頌邇年臻大耄

天子方珍從吾黨

久不歸狂簡豈道統無物表拳拳祇拈瓣香供昨君還
嘉禾新詩寄一封錯槩應已鰲魚沉或致壅竭來居京
師談經開雲霧信是韓門弟俗解化愚癡傾聆未多時
世事忽變綜是非自分明何須再聚訟

題司務王雨莊

世維

字鵠山房四首

并序

雨莊淳安人

先石亭公丙子浙闈所得士候

補司務是年己丑春闈得第爲武進相國劉文
定公所知朝考以論冒有維皇降衷語疑爲闕
節遂黜不用住韓家潭淳安館鬱鬱不得志余

將回南就辭之出其字塢山房圖屬題爲題四
首蓋以速其歸而戒其留也

淳安山水本名區寫入溪藤盡可娛試問何人名字塢
知藏居士舊書厨田橫海上餘三島范蠡門前卽五湖
是處逍遙皆可樂鯢鵬何必問前途

欵段今應悔出乘當年徒步祗農塍人情薄似雲披絮
天意渾如霧籠簷底事功名如火急轉教宦思若水凝
披圖忽動憐才歎草閣栽詩似薛能

數間茅屋下臨溪碧蘚蒼藤路欲迷此去可偕禽慶任
再來莫誤鹿門攜世途無限羊腸險冲漢其如羽翮低

我亦明朝賦歸去亭臺雖小儘堪紮

嗟爾吾家陸氏莊清風猶見水流長那能鷗應三台象
空望鵬程一翅張君相果然能造命功名休矣且還鄉
子雲剩有侯芭在莫使傳經事渺茫

宿保定和編修祝芷塘同年送別韻

冀北空回首燕南忽失羣人辭清苑月馬望太行雲已
作歸山計虛傳報國文傷心薊門別惟爾最殷勤

題夏氏園亭壁四絕

短牆出枯桐古井有人汲野雀飛上枝驚落一亭雪
亦有小闌干雖矮尚堪坐忽見竹數枝寫出字幾個

有客茶爐邊繫馬柳陰下相看欲有言臨去竟無話
獨輪小車子天寒亦裸裎茶罷汗如洗輾轉復前行

過湯陰縣謁岳忠武王祠并序

岳忠武之死世皆謂秦檜與万俟卨輩醜成余謂不然此皆高
宗意也高宗爲徽宗第九子自金逃歸北狩禍起而位臨安早
育太祖七世孫秦王德芳後秀王偶子存於宮中爲皇太子其
力主和議也秦檜曾經三辭不許夫高宗豈不念父兄二帝哉
太祖不傳位於子而傳於弟世人多以此不平且燭影斧聲史
多諱語高宗豈不知之一傳不還以至徽欽被擒中原無主知
天心之有在也夫忠臣以成和議其後育率受內禪是爲孝
宗後皆太祖孫矣所以順天心也若使父兄得歸將置存于何
地乎故忍而爲此爲家庭計雖不孝爲社稷計則大孝矣故于
岳祠特表此論

當年和議出君王大獄深宮實主張人謂冤如檀道濟
我憐功可郭汾陽金牌十二徽欽死鐵犯千秋檜萬當

要識高宗心裏事也應太祖嫡孫皇

過新鄉見路生必達求易名爲改各登瀛

最妨欲速達偏遲不是瀛洲達亦卑九萬里風從我起
雲鵬送汝上天池

新鄉縣白鶴觀觀劉海蟾丹篆歌

廣陵道人劉元英自言曾讀黃庭經朝來羽化忽飛去
名山處處皆留形新鄉城東白鶴觀丹書七字紅光爛
龍蛇飛舞蛟鰐空萬古彩雲猶未散相傳抄錄須鉛黃
半紙可禦魍魎藏安得登登搗百本一掃人間狐狸狂
憶昔道人本廝仕忽從累卵悟真契解組直上芙蓉頂

拍手多言秦世事醉來峯頂自提壺身後攜琴碧眼奴
至今恍惚百千歲有人時說逢成都我今正爲官束縛
葛洪那許造其屋龍虎雖燒事已遲祇想溪田自栽秫
我聞仙骨天生成不須靈符能上騰倘謂仙人在丹訣
我亦吞象思飛昇

望漢獻帝陵

在修武縣

高皇基業危如綫鬼蜮夜哭蛇蟠殿赤帝已盡黃巾來
天下唯推董公健羣奸草澤皆乘風可憐子府徒空空
大勢已入曹瞞掌玩弄天子如兒童人中之龍孔文舉
使君英雄更無伍三尺輕綃謀不成此非人爲天不許

誰教他日呼郗公牽衣掩泣泣成紅寸土已非劉氏有
魂歸萬古山陽中涿鹿城邊遺故宅狐兔爲羣鴉格磔
却看銅臺瓦上霜一樣荒郊秋月白

謁韓文公墓

在孟縣紫金山

孔孟相傳後惟公是替人九重爭佛骨萬里竄孤身論
語魯箋魯張籍祭退之詩有魯論未訖注手跡今發荒之句文章務去陳不應
推道學獨讓宋儒真

北邙

有生必有亡何獨此平岡粉黛啼黃上英雄聚白楊四
時多殺氣萬古總斜陽大抵山俱骨微高是帝王

石壕

澠水喚舟渡石壕剪燈宿何處催租吏又來打人屋

甘壕途中夢先大夫作

夢斷空山淚濕襟征途雄辨有魂尋霜髯雪鬢驚重面
玉潔冰清話素心依舊蒼皇言不盡未分黑白恨終沉
何堪執手丁寧後猶自聲聲念翰林

夢中報余復官翰林

硤石

峭谷雲高曉霽登居民架屋住層層山連熊耳趨三晉
阪折羊腸上一二陵轆轤漸開牛鐸近崎嶇却仗馬蹄能
平生夙凜垂堂戒縱履夷途亦戰兢

乞兒行

我行陝州十二月山雪河水野騷屑無數小兒身無衣
馬前跪啼一錢乞我憐其寒細叩問汝曹胡爲皆予子
中有黠者手足拳似指似畫向余說家有薄田數十畝
無收苦爲遭旱魃老壯異鄉各餬口幼稚無能守門闥
近聞朝廷憐赤子給賑億萬內府竭朝來衢市看
黃榜歡聲直與河聲埒粥廠遙開各浮屠趨赴惟恐門
先閉不知官吏中飽無十人未得一放啜非無父母相
提攜救已不暇寧相沼自憐生在甘棠鄉枝葉於今剪
拜絕留養雖設不能留棄擲道途誰見納縱復苟旦免

饑號觸怒往往遭鞭撻一聞其言心悽惻救汝那無囊
中物我亦天涯乞遍人艱難幾見心肝豁揮去哭聲聞
漸遠我亦車中淚嗚咽

華陰廟登萬壽閣二首

高閣巍巍最上頭羣奇嶽色望中收雲推白日當窓掛
雨挾黃河入檻攏三輔風光通指顧五陵佳氣杳泝浮
年來欲學希夷睡懶卧人間百尺樓

何須天柱侈崑崙須信秦關華岳尊地閱古今九日月
人從上下納乾坤鴻濛元氣清雲合縹緲靈烟白晝昏
堪笑探奇老韓愈藤蘿百丈手先捫

華州謁汾陽王祠

宇宙黃虬定河山赤手開萬人橋上拜單騎敵中來下
士誰知已中興仗大才雲旗何肅漠日夜鼓風雷

溫泉

翠栢雲生繡嶺隈華清宮殿已成灰只今惟有溫泉月
曾見楊妃賜浴來

灞陵橋

昔日橋邊折楊柳行人衣上雨層層而今詩思渾寥落
風雪騎驢又灞陵

薦福寺

俗呼雁塔寺

雁塔荒郊翠栢枯雷轟碑碣到今無題名韋肇人何在

競病詩成屬武夫

訪唐人題名碑皆無惟武
鄉縣數碑名贊以詩而已

茂陵

紫星宮殿碧岩堯水咽瓊瑤恨寂寥內苑桂花秋月墜
歌臺蘭葉夜風飄玉桃不見偷方朔金屋空聞貯阿嬌
失勢惟餘陵畔石礪刀時復走芻蕘

觀音堂

是日遇漢州張邦楷

咫尺巖關隴蜀分猿聲不住亂山聞店門人對千峯雪
嶺表僧歸兩袖雲新險何勞頻躡屐故交偏足慰殷勤
分明舊口題詩處不忍重題五內焚

煎茶坪觀瀑

何年白龍下掛在煎茶坪恍如雷霆吼勢若天河傾奔
林何決莽觸石復怒獐遂覺千山雨全無一日晴維時
冬方雪濺落皆碎瓊雲露噴未已凝作冰敲鏗馬蹄如
踏鐵僕夫愁不行而我了不顧但愛聲琤琤安得鑿潭
洞貯爲百丈清一洗熱中腸永無冰炭榮

新紅峽

衆山隨我來入峽忽相別但見天一綫微曦時透泄綠
蘿間翠竹細徑造幽絕小橋聚澄泓水底卧斷碣忽見
麋引子來飲驚一瞥余意類山梁中熱化寒冽乃知機

心盡物我皆可悅仰觀太古松上有六月雪孤雲動高
興散髮思巖穴倘有紅崖招便此杖九節

再題南星鎮店壁 果親王墨松

靈虬蟠不任忽向粉壁入自從潑墨來夜夜風雨急

青羊橋

忽聞介馬聲隔山馳驟至草木動鱗甲無風自恣肆須
臾破林缺乃見飛流駛汪洋青羊河澎湃何其恣如傾
萬斛泉奮激上人背石齒如劒鏘磨淬出廉利倘爲石
所川一躓便失墜吁嗟行路難坐定猶驚悸

馬鞍嶺

人在馬鞍上復上馬鞍嶺馬鞍二十四與我共馳騁筋
力已疲癱犖確反骨鯁一上復一下或睡或復醒馬蹄
生鐵蹄人面死灰冷黑景入轡轡白日匿光景石虎蹊
兩旁人馬各相警納納大乾坤余胡涉此境

虎頭關

殘冬入棧來閱歷險無數滾滾上雲巒更值虎頭怒密
箐垂陰寒深巖散毒霧內外蛇鬪門攫人若奔赴滑石
累爲九浮梁梟撐柱水石交一線驚呼幸不仆崖畔舊
墩臺大轟昔曾豎時清空戰場月黑餘古戍登高試矯
首竭塞生悼懼

觀音碣

峭石森如竹我從筇尖過雲逗斧錯痕雷擊水溜破却
入觀音碣未出不敢賀沉潭見龍行懸崖驚虎卧不知
洞口深但覺已身大生涯信跼蹐豈獨爲寒餓負罪如
邱山安能辭挫折臨危祝慈航收此微軀儒

漢中太守翁誠軒留飲漢臺清暉亭

取道褒斜訪舊遊欣逢太守鎮梁州棧經燒後山皆出
壇旣傾時水自流客到花間逢吏去碁拋松下遣僮收
從來不信專城樂今看同登最上樓

潭毒關

路近古三泉逢人問潭毒昔年劉將軍堡壘於此築二
更鼓角吹萬竈貔貅宿飛龍恃古氏白馬戍太纛金人
不敢近得隴安望蜀當時號偏安邊隅日踟躕雖封一
丸泥旋看鼎折足宋室付波濤興亡等碁局至今森壁
嶂陰風猶肅肅堅城平爲田幕府上樵牧空使後世人
聞名頸猶縮吁嗟客不寐掩冉村燈煜

寬川舖

寬川忽不寬仄身入巉巖兩壁摩蒼蒼仰見天在管冷
冷何處泉清可數苔蘇流沫不成輪空雷石上轉古洞
吐素雲線路縈蜀棧行子忽愁思橫峯欲盡到胡爲披

衆叢犖确走成跡。悶代通人力。大路歸平坦。金牛事有
無。付之一笑莞。

五丁關

是誰持大斧。劃破萬古石。礪琅剗一聲。乾坤忽中拆。至
今斧鑿痕似見。巨靈擘漾水走其下。日夕相瀾澍嶙嶸。
失大險。連山斷根脈。我馬立其巔。望見劍門闕。暗雷走
空山。鎮日驚辟易。秦蜀何年通。呼吸此爲屬。嗟嗟善哉
行。恨無生身翮。

界牌嶺

冬行雖幽墨。冰雪出明爽。新曦下危峩。稍見天宇廣。嶺

陸頻迴互鬱勃如修鱗我從尾上行步步不敢仰山房
蓋木皮居民訝魍魎見人或不冠自陳體羸莽俗惡雖
可憎方言吾鄉倣飯飽一談餘眼底朱軼掌何須見鹿
頭始作故鄉想

百牢關

時清本無關古戍峭壁倚石磴漸入雲風聲遶山背盤
盤鳥爭道轟轟車在水百牢一以過村落亦可喜吏卒
本耕農嚴冬間耜耒宿麥短於髮時見飛野雉山路不
逢人石隙半牛矢惜哉未得住其鄰可治此天險非昔
時何處問軍壘行邁有程期但覓古轍軌

閔家坡

自入武都來千巖毒乃忽失古藤惡於蛇頑石黑類漆舉
步困黃泥入幽墮時明至人家何所樹山山皆橡栗葉落
空林高下見古邨野官閑吏亦倦時聞驚馬逸捫懷忽
自慚却憶登朝日有命益國家無文武得無融不如放深
山春隨伍卒萬壯諒不能安寢或可必

童山詩集卷十一

綿州李調元雨村

庚寅

木寨山

季冬攜童稚辛苦經秦山庚寅正月初始底蜀邊關石
門沕霜雪古鎮稠峯巒老松不肯死根走壤棧間暗水
白刃澁巖柳青芽還嗟我遠遊子逾年無改顏何日美
蓉溪下聽水潄潄

七盤關

我從高春來俯見盤關壩七折上丹梯凌虛若可跨及

王登層巔諸山皆在下人疲十步坐竹杖不相借舉頭
天一握始覺險可怕煎茗有山僧邀至古蘭若推出西
南窓爲指兩峯鏤蜀道如青天危棧此初架莫嫌路透
迤岷山色可迂回首望秦中何啻太少華阻阨歷已半
得安且稍假遠見故鄉田紛紛露穠穰飽食有今年慰
語良足謝

籌筆驛

卽神仙驛

憶昔興師討賊曹深山獨坐運籌勞六韜氣壓貔貅靜
八陣雲屯虎豹號荀息託孤唯一死魏公早惡夢同槽
至今古壘生春草長見遺民拾寶刀

龍洞背

諸水如遊龍曲折赴龍洞雷霆爭蕩激憤怒聲相聞入
從背上行乍覺鱗鱗動造次出之而陰風生暗恐橫梁
高於壩跨天儼成竦十里馬蹄脫九折羊腸慟不敢此
暫停去去催我鞚猶聞遠灘聲洶洶隔山送

朝天關

朝天在天上嵯岬少人行怒目似相待意氣如不平不
知我亦謫輕舟過無聲雙槳不驚鷗玩此一水清仰看
頭上石仍見空中橫冰牙綴頰岸齧攫何猙獰爲我謝
山靈無爲腹膨脝

飛仙閣

入峽祇一舍峯巒更偏仄人擔豺虎憂江帶鼉鼉色何
年飛仙閣高際入無極萬瓦照山光千佛鑄西域上有
連雲陰下有沉潭黑蛇蟠九曲灣鳥道一竿直丹梯不
在地赤手上無力艱哉徒旅人垂堂戒不測

猿

網羅聞更密底事樹頭懸通臂終何益如拳絕可憐聲
愁三峽月腸斷一林烟隱見胡須問祇應學四禪

牛頭山

戔戔上牛頭一握天在手浩呼風四來草木如人走盤

空大石磴鈎梯何其陡馬比飛鵬高路在垂猿右乍覺
岷峩低方知華嶽後長行力已疲徒御相攜負山僧憐
我因招坐佛閣牖開窓望諸山一覽真不朽却看舊題
壁吁嗟重回首

劍門

劍門非刻劃乃是真崇墉何來芙蓉鏑森插燥堞中青
天亦受鑱豈非刀州鋒突地起樓閣勢欲吞崕峒壯哉
天下險寧與長城同當關苟一夫萬卒何能攻歷代紛
割據蕭牆自興戎譬如人腹病皮膚豈能充天棧不足
恃修德乃弭凶試看井蛙輩千古嗤愚蒙

玉書送至武連廢縣同遊覺苑寺看諸碑刻用陸
放翁舊韻賦別

尋幽得與故人期緩步叢林鳥未知稚柳溪橋烟欲織
野花山店雨如絲何年斷碣僧摹遍一夜挑燈客睡遲
最是不堪回首處學堂同伴讀書時

寒食夜雨與家雲章何來儀舍弟龍山墨莊姪斜
溪同賦

高軒紅燭夜筵開有客初同上塚迴剛是酒闌人欲卧
梨花葉上雨聲來

五月五日捕蠶歌

庚寅之歲五月五清風習習涼無暑吾儕鬪草柳陰西
爭斬青蒲懸艾虎忽傳此日宜蠶酥惡狀膨臍莫敢侮
閒攜稚兒出門去撥草搜根到深圃是時微雨雲濛濛
竹罇當天不知午蘂荷密蔭蒟蒻遮有物輪囷色如土
蠢蠢徐步出苔陰怒氣迎人腹如鼓呼兒鹽腦伏以鉗
眼頻口閉不能吐乃知雖有偉身軀技止此耳真驢伍
試看填墨掛風簷百計躲藏究何補

示譚鼎二弟並諸生

廿年奔走亦云勞回首風塵重鬱陶富貴如雲天上看
功名似月水中撈志懷鴻鵠真吾事力掣鯨魚視汝曹

言集卷一
欲問當時畢吏部如今左手正持螯

觀簞魚歌

秧田水滿河水枯鄰人相呼來簞魚手提簞籬赤兩足
脫却布袴涸深渠先分段落作水塹然後缺處安大眾
溝上滿下盡占據巨細不漏如罟罟小魚跳藻自翻擲
大魚怒目空睚眦豈知若輩貪酷意洗盡不啻屠者屠
我從柳陰袖手看徙倚終日還嗟吁得多得少亦偶耳
甚美甚苦非忍乎淘汰卽今似梳櫛蛟龍豈向池中趨
誓欲乘風破浪去安能坐困如余且

題朱子頴米顛拜石圖

半空落危石挂在巖樹西米老見卽拜拱立顏色低
觀乃是子頴畫小溟釣客旁留題畫石如人高難躋
畫人如石古莫媿我昔在京華曾與同雞棲布衣王侯間
名與巨然齊維時名見勅勤政殿中官宣勅登堦梯
畫成大石呈御覽天威忽霽如天倪別來已十載
夢寐猶相携今日見此障渾如親所齋聞道頻年官九
轉太守善政傳鄉黎知君愛古癖於米相思夜夜下渝
溪

墨莊病頂

木瘿石暈本物病取妍於人用常便君亦吾家有材

重山詩集卷一
王
故令病頂妨凝燕今年槐花舉子忙正值八月魚龍變
天教換骨脫凡胎怒飛萬里捷於箭我亦平生強項人
有長磨折何能擅豈惟直道世不容室人亦復交責譴
我當讓君出一頭佇看嶄然頭角見

醒園獨坐二首寄龍山墨莊二弟

自嬰塵世界每爲物所羈看花雖獨往何曾不相思相
思亦無厭夙與文字期龍山才頗豪螻蛄雜蛟螭青紅
浮大海其色難磷緇墨莊最嗜古落筆尚苦遲每造幽
淡處芳蘭茁堦墀二子雖遠我其實各有之秀密乃吾
文雄放似我詩倘能相覲善豈不成全奇吾衰無所用

鈍拙徒自知日從僮僕後背手看花移但願汝曹志似
此揚芬時桂子雖月中何難摘一枝持此滿我志曷用
空思爲

平生好游俠學道苦不早艱難已過嘗清興忽如掃功
名旣坎圻遭家復不造每從午夜思所作皆顛倒痛我
先大夫臨病不待禱兒癡諸未諳舍去不相保經營
自年事無乃太草草奮欲凌雲翔方外絕煩惱如火日
燒身愈避愈就燥天地何所逃千慮終未好汝曹方盛
年強箭穿魯縞我視名爲屣汝視名爲寶是非兩相較
俱未爲知道看我婚嫁畢入山讀黃老

偶筆

八九年前舊史官只令衰病卧林巒日斜嶺上搯高枕
夜靜溪邊下釣竿驥伏猶思千里遠鳥還竟少一枝安
旁人莫怪雞棲早久矣天衢戢羽翰

繡毳已春放矣而秋後忽發殆墨莊鄉閭佳兆乎
春初已見雪成團又得凌秋一朵看不爲園中增景色
知從闌裏發祥觀蕊含瑣碎星初摘香綴瓊瓏露未乾
莫道廣寒宮尚遠仙娥早贈玉珊珊

恭題先大夫射雁圖

梧陰書舍生青苒諸生揖我授經臺仰見先君射雁

憶悽然不語同驚猜就中獨有孤兒痛欲說涕泗先盈
顯憶昔遊宦勾餘地年雖十八心尚孩同城都閭華公
子輕車肥馬相追陪縣尉廳前平於掌早起較射宵未
回是時先君勤王事簿書未暇風火催一旦脫幘憩
亭午手持羽扇徐徐來笑然烏號指廳樹一箭正中當
門槐其日雨霽天宇曠觀者如堵聲如雷公子失色嗟
神勇縣尉賀酒斟金杯吼山名震潮夜起洋海盜遜帆
晨開自此準堂開畫戟先命貫楊馳其驟浙東燕北足
幾遍矢箠常教隨龍媒歸來闌園醒園內兩行綠柳臨
江栽箭臺築起凌霄漢松根作榻留山隈至今夜月照

巖谷颯颯精爽生蒿萊語猶未了聲嗚咽已見木壞連
山頽魂魄夢寐或一見羣魚風樹徒悲哀父書手澤雖
未斬髣髴不記豐隆頽試卽此圖細端視自愧趨庭鯉
不才家計渾如破巢那負重責若鹽車駘請君看取天
上雁一雙綰繳毛毳毳漸遠漸陸復何用祇足宰割供
庖煨急須什襲傳似續作此遺戒意頗該他日休教粉
壁掛見之空令心傷摧

詠新竹二十韻

嫩竹初生塢新陰便滿庭何年承雨露此日拆雷霆出
筍非從饌行鞭忽走坳通天攢箭括開地長筍筍不擬

淇園見能留嶰谷聽抽梢逾萊甲扶幹賴園丁加壅勤
鋤畚頻澆倒罌甌嘯時觀自足醉日種方醒正欲燒羊
角旋看集鳳翎湘妃蓬染淚稚子早添齡瀟酒姿猶怯
嬋娟貌亦婷閑來行小閣坐去望高廳細霧前軒護輕
烟別院停斜陰穿北戶疎影映南檣潤滴莓苔砌鮮連
藻荇汀幾竿偏裊裊數尺自亭亭籊落因風舞枝低爲
雨零呼卽原是綠喚士可名青直節多中蘊虛心實外
形清貧饒不得何問渭同涇

戲墨莊

墨莊先生貌如墨平居垢而不修飾垂頭頗類李臺鄉

重刊言集卷十一
七竅烟雨同一色口中含煤背懷板前身應是海鳥賊
忽然變化出人間爲龍爲蛇不可測旁人大笑君謂然
故以爲莊了無惡豈知先生胸有奇觀書如月照幽域
九天咳唾盡珠璣白雪陽春光欲逼我觀先生真嫵媚
外雖黯黯中淵默我聞老子談道德所貴知白而守黑
請君看取姦好人滿腹塵埃誰能拭

夜歸

遍身衣露月朦朦夜靜初歸仲蔚蓬山犬吠來茅屋外
水禽啼入稻花中開胸幸遇炎炎暑刮面先愁獵獵風
多少心情如緒亂一齊付與草間蟲

蹇驢行 爲祝芷塘作

蹇驢道路立肥馬當風嘶向吟樂天句頗笑言無稽豈
知今與古世異理則齊昨日僭僮僕步出城門西鹿頭
何亭亭解鞍聊雞棲何處唱道聲煌煌 敕書齋軟輿
牽百夫旌旄耀虹霓併問此何官年少列金闥星輅指
萬里來此登天梯我從稠人中時復一睥睨似認故人
面夙好今已睽雖然首未俯未免顏先低同此大道上
相隔如雲泥達人貴安命升沉寧自迷歎息下山去世
事難重題

送別桂山

蓮廬天地總羈縻
爪跡何須苦印泥
招飲欲分山小大
卜居知在瀼東西
都中朋好惟君密
蜀下聲名與我齊
回憶錦城風雨夜
床頭話別不堪題

偕王晴峯遊張泗澈晚園

王子清晨發奇興
叩門繫馬門前柳
爲余指說城南隅
有園澈晚堪携酒
入門所見俱離奇
十步已經移目九
可憐名花擅西蜀
怪石復出仇池右
中有小樓高且危
乾坤俯仰歸一牖
渾忘身似醺內雞
便覺樂同橘中叟
主人不知去何處
如此湖山名利走
我本急流勇退人
惜乎此園非吾有

夜宿德陽

人行風露下悄寂各無聲燈近遙知市林深不辨城夜
眠食一覺斗轉欲三更無限蕭梢意中年百感生

石鏡屏歌

并序

石鏡屏羅江令雲南楊古華先生周冕所藏也
出自大理點蒼山其圓如鏡白如月中有黑雲
突起一峯似有人立於峯上雲氣超忽若遠若
近甚可寶也古華要余作歌詩成遂以相贈

古華學書學黃華一筆一畫皆如虵古華愛石愛老米
一紙一經如追蠡獨有石鏡如鏡平圓如月到十五盈

下爲波濤上雲霧十洲三島環蓬瀛其中一峯危且巖
四面海水相漶濬上有一人袒左肩頗似吳剛持斧立
袖飄飄而吹風足騰騰而乘空忽不知其所往今亦不
知其來何從主人徐爲陳始末此鎮出自黠蒼竊每逢
八月月出時直疑上下有二月巧匠斲石比月較此詩
更比石爭巧石不能言我代言石願共爲天下寶

奉和祝芷塘

德麟

同年典試道出羅江見懷元韻

卽邀明目同遊草堂寺並簡嘉定守曹秋漁
年俱到

京中易得朋林下難覓友君

銜王命來恰我歸蜀後

初聞默自祝佳會良非偶祗愁李下嫌整冠戒加首昨
者翰軒過蹇驢避道右相對隔雲泥不敢肆狎狙今朝
歡相見屈指闊月九起居高堂萱問訊靈和柳契深話
亦長追往客屢愀維時曹嘉州給事皇華牡當年我三
人如鳳共一藪升沉八年間似隔紀與茆嗟余獨蹭蹬
衣袖猶深黜廣廈得造談賴此賢太守余季雖能文翻
翻寧識某戰場迷五色獨拔幸亦苟我家潞亭西頗有
田十畝下俯芙蓉溪遶樹堪攜手過門可無入致目登
拜母明日草堂寺此遊真不朽千里來劍南倏遲况未
久少陵已歇絕亟借詩人口勸君速命駕他事無被肘

野鳥望行旌溪魚仰山斗正屆重陽期間君有意否

陪祝芷塘

德麟

鄧筆山

文洋

兩太史遊少陵草堂

此地獨千古爲因子美祠只容人載酒不許客題詩今
遇雙星至同參百世師不知滄海上誰定掣鯨鯢

芷塘筆山枉駕醒園

四牡駢駢謬見過忙開家釀盡千螺文章敢詔同人服
談笑何妨俗物訶三載離情今日吐萬山深處使星多
年來良友晨星散何意風吹到薜蘿

和編修祝芷塘同年留題醒園用杜少陵遊何將軍

軍山林韻十首

憶昔金山別魂銷似灞橋日邊迴彩旆天上隔丹霄
驛路皇華記翹車玉帛招今宵燈送喜萬里尺書遙
平衡洵不爽水鏡本來清已入班中鷺猶思谷口鶯
淡如君子水食愧小人羹不是玉山朗焉能玉壘行

疴抱年來久逢迎總強支錯疑楊子宅枉過習家池
呵道山猿避聲名野鶴知怪君詩筆健珥筆不停披

余季非荆樹同時得桂花無心收玉兔有客詫弓蛇
佳話傳教遍高談興獨除海寧能到否亦欲訪君家

榜掇惟君少科逢萬壽開名能書淡墨人尚弄青梅
今日崔羣至人傳衛玠來不知桃李內誰步玉階苔

建昌出名馬慣走似奔泉棧道登雖險沙堤踏似綿珍
珠雙夾鏡蹀躞小連錢脫贈君知否文旌再督川

高軒來過處草木尚餘香坐石茵猶暖催花酒未涼題
詩龍尚活起舞鳥皆藏直到雞鳴候方知曉色蒼

園林全種竹亭閣半臨池童子敲茶臼山翁倒接羅登
堂先拜母排闥屢驚兒不是王程速猶思百里隨

並馬渡江去聯鑣盡入雲山川皆別賦風雨助談文棧
閣程空數綿州路早分同年來有幾老淚落紛紛

稚子真如杜將軍不姓何名平瓜未種潘岳果偏多難
忘青燈語慙賡白雪歌至今明月夜猶夢使星過

編修 祝德麟 正德
海寧

跡滯三秋後身遊萬里橋黃花明異域青鳥返重霄
短李幽居僻長鬚笑騎招逢迎欣得主造訪肯辭勞
減從聯雙騎天光出郭清溪喧惟祭獮秋老不聞鶯
野父除瓜架山妻茹菜羹殷勤語楚客何似武陵行
林外波聲活潑江別一支比牛收水磨呼鴨上陂池
徑亂增樵慈密重獨鳥知只因遊屐過荊棘已教披
已近醒園路山寒少雜花插峰山似象赴壑水如蛇
鱗鯨看松嫩杯棹想澤餘他年長千尺喬木識君家

紫荊無灑掃今日逐江開堂構方求木寒暄異望梅
楊懸徐孺至黍見范卿來爲問門前路客誰損綠書
握手出詩集高源詞湧泉思親新涕淚懷友藉纏綿
唱和聯諸謝評論待老錢用村素學詩於香樹翁所極賞雕客雙
桂後若箇長西川楊升菴先生雙桂堂在新都今已廢

飲我卽筒酒春醪麴米香庖烟衝曉濕園菜益津涼
選忘兒能誦杯乾婦久戴乘醺思振策下界鬱蒼蒼
熹微尋石磴曲徑半臨池直欲謀苓箸頗來着接羅
人家團竹色秋水梨魚兒早識溪山美應令畫手隨
雪嶺明晴旭花驄撥亂雲碑前重墮淚身後但遺文

拜母衣冠肅論交
輩行分童時遊釣處
指點復紛紛
一飯南村舍
臨岐意若何
別人甘語少
看客比鄰多
敢忘對床約
難爲行路歌
回頭問野老
使節幾經過
偕弟墨莊賦
瓶中白菊

傲霜枝在膽瓶中
移看燈前鴈序同
照去離離疑映雪
香來冉冉不因風
恰宜送酒人衣白
翻襯哦詩客面紅
堪笑天隨老居士
癡心欲種滿蟾宮
陸魯望詠白菊詩
有月中若有開田
地爲勸婦娥
作意栽之句

再到秀河贈熊坡山

浮踪不定似飄蓬
纔得西歸又復東
映日水花顏似紫

經秋山果色多紅
主人笑語情如舊
世道翻更事不同
惟有青山松與柏
不凋終在歲寒中

贈熊來豐

主人家住秀河南
楊柳橋西暫解驂
酌斗已酣寧過五
過門不入莫嫌三
共傳張藉多豪咏
可許阿戎一放談
聞道年來深養晦
高齋長是學禪叅

神泉道中

誰家桑柘蔭眠犢
舍前舍後種慈竹
少婦出門汲水歸
簪邊斜插西番菊

山羅江至中江夜行

逢人便問艾家壩遙指松林山外村天近黃昏行不到
星星燈火出蓬門

嶺上疎星煜煜明四鄰悄寂各無聲東家犬吠西家應
知是行人冒夜行

偕墨莊至中江訪孟鷺洲侍御

山迎秀色入城中天遣清樽此日同幾樹梅花詩興作
一時題遍畫堂東